

AKASHVANI AIZAWL

REGIONAL NEWS BULLETIN

HEADLINES (EVENING)

1. Lawngtlai leh Siaha district a tuihri leng mek chuan zia-awm lam a pan zel a, Myanmar ramri khar mek pawh hlih thuai tum a ni.
2. Myanmar atanga tun hnaia Mizorama rawn raltlan lo lut tharte chenna tur chu Champhai District a Vaphai khuaah sak mek a ni.
3. LADC a sorkar siam tura inbuatsaih mekah kar leh Nilaini khian council chairman thlan a ni dawn.
4. Chhatisgarh Bastar Division-a Maoist leh security force-te inbeihna thlengah Maoist 14 an thi.

<><><>

CHOLERA

Lawngtlai leh Siaha district a tuihri leng mek chuan zia-awm lam a pan zel a, Myanmar ramri khar mek pawh hlih thuai tum a ni.

Lawngtlai district bawrhsap Pu Donny Lalruatsanga chuan an district a tuihri leng chu a zia-awm tawh hle tih Akashvani Aizawl news a hrih a. Ven thawh thil thu-ah erawh chuan he hri rawn putluhna ber ni a hriat Myanmar ramri chu khar chhunzawm a la ni a. Chutih lai-in thla 2 khar tur tih chu pawt tawi-in tun thla ni 10- a hlih tura ruahman a nih thu a sawi. Puan tawh angin Lawngtlai district-a Kakichhuah khua-ah nikum November thla khan tuihri avangin mi 6 an thi a, December thla chawhnu lamah 4 an thi a, Lawngtlai district-ah mi 10 an thi a ni. December thla chawhnu lam hian tuihri natna vei mi 8 chu Lairam Christian Medical Centre & Hospital-ah enkawl an ni bawh. Hetiang a nih avang hin Lawngtlai bawrhsap chuan December ni 23 khan thla hnih chhung atan Myanmar ramri kharna thupek a chhuah a ni.

Siaha district Additional DC Pu Abraham Beirazi Khithie chuan ramri khar thupek a chhuah, naktuka tawp tur chu pawhsei a nih dawn leh dawn loh a la sawi theih loh thu Akashvani Aizawl news a hrih a. Tuihri leng dinhmun chu a zia-awm tawh hle a an hriat thu a sawi a. Ramri khar chuan zawm that a hlawh tih a sawi bawh. Siaha district-ah hian November thla khan tuihri avangin mi 3 an thi a. December thla chawhnu lamah khan Lomasu, Lodaw, Lopu leh Khaikhy khua-ah te a leng leh a, nunna chan erawh chu an awm lo. Tipa community health centre (CHC)

a tuihri natna vei dahluh mi 6 bak chu kai thar an awm tawh lo ni a a hriat thu a sawi a. Addl. DC chuan tuihri natna kaite hi Myanmar lama bungraw phurlut thin lirthei khalhtute leh sumdawng vek an nih thu a sawi a ni.

Ramri khar lai hian Myanmar lam atanga sumdawnga lo lut an awm hranpa loh avangin Mizoram atanga bungraw hralh tura kal dan vek an ni a. A ruka kawng danga kal an awm a nih loh chuan insumdawnga atana kawng hman pui berte chu khar tlat a ni rih. Chin state chhim lam Paletwa leh a chheh vel khua-ah tuihri hi a len avangin insumdawn tawnga a Mizoram lam atanga inhnawmawihthe'n an kai tih hria-in ramri hi khar a ni.

<><><>

MURDER-REACTIONS

MHIP General Headquarters leh MHIP Sub-headquarters, Lunglei chuan December ni 31 zana a chenna in-a Pi Vanlalngaii kum 78, Lunglei Bazar Veng rawng taka thah a ni chu an dem thu leh pawl an tih thu an sawi.

Hmeichhiate chungah kutthlakna a thleng thin leh thihna hial a thleng thin chu na an tih thu MHIP Gen. Hqrs chuan an sawi a ni. Hetihrial hian Lunglei Police-in Pi Vanlalngaii thattu Johnny Rosangliana kum 41, Lunglei Bazar Veng rang taka an man chhuak nghal chu lawmawm an tih thu an sawi a, tualthattu chu dan angin a phu tawh hremna pek ngei an phut tih an sawi. Lunglei Bazar Veng Local Council pawhin he tualthahna chungchangah hian thuchhuah siamin mahni chauha khawsa, tar chak lo leh pawisawi lo, a neih chhun tlemte it a rawng taka a nunna hial la duhtu chu an dem tak zet a, a phu tawh hremna hmu ngei se an ti a ni.

Lunglei Bazar Branch YMA pawhin thu chhuahin YMA Bazar Veng Branch Executive Committee nimin Zirtawpni-a thukhawm chuan pawikhawhtu a puh Pu Johnny Rosangliana, Bazar Veng Lunglei chu ruihhlo avanga tar chaklo leh tanpui ngai Pi K. Vanlalngaii nunna la duh khawpa a che mai chu an dem takzet tih an sawi a, pawikhawhtu a puh rang taka man chhuaktu Lunglei Police te an chhuangin Lunglei District SP leh a thawhpuite darkar 24 chhunga pawikhawhtu a puh an man hman chu an lawm takzet tih an sawi bawh a ni.

<><><>

G R A M G

Khawzawl Krishi Vigyan Kendra (KVK) chuan Central lam atanga hriattirna an dawn bawhzuiin vawin khan Khawzawl Vengtharah Mahatma Gandhi National Rural Employment Guarantee Act (MGNREGA) thlakna tur Viksit Bharat-Guarantee for Rozgar and Ajeevika Mission (Gramin) (VB-G R A M G) Act, 2025 chungchang inhrilhhriatna hun an buatsaih.

Vawin hun hmanna-ah hian KVK Khawzawl Sr. Scientist & Head Dr. Malsawmkimi chuan thla hlui ni 16 a Lok Sabha in MGNREGS thlakna tur Bill a pawm tak VB-G R A M G Act chungchang hi sawifiahin hemi hnuaiah hian kumkhatah mipui inhlawhfakna chu ni 100 ni tawh lovin ni 125 kalpui a nih tur thu te, Mizoram tan sum inthawh tawm danah Mizoram sorkarin za zela 10 chauh a tum zui ve tur thu te tarlangin hnathawhna tura ngaih pawimawh bik te a tarlang bawh.

Vawin Awareness Campaign-ah hian mi 75 vel an tel a ni.

<><><>

REFUGEES

Myanmar atanga tun hnaia Mizorama rawn raltlan lo lut tharte chenna tur chu Champhai District a Vaphai khuaah sak mek a ni.

Vaphai VCP Pu Rengkhuma sawi danin tuna Myanmar raltlan mi 42-te an dah mekna Fiaratui Middle School chu January ni 7 ah sikul an luh tan tawh dawn avangin tihruah a ngai a, tunah hian Vaphai khuaa Bungmualah raltlante chenna tur sak mek a ni. Pu Rengkhuma chuan tunah hian Fiaratui Middle School a awm mek mi 42-te sawnna tur hi hmanhmawh taka sak mek a ni a. Vaphai Community Hall a awm chhungkaw 11 a mi 47 te chenna tur pawh la sak tum tho a ni chungin a la hmanhmawh theih vak rih loh niin a sawi. Sawrkar atanga sum leh pai pekchhuah a la awm loh avangin Raltlante ei leh in tur hi Khawbung BDO remruatna angin khawtlang hruaituten a tul angin an lo bawhzui thin a, hetihlai hian Vaphai camp-a Assam Rifle ten raltlante hi buhfai, tel, dailuah, bawngnhnute leh chini te an pe a ni.

Tarlan tawh angin Myanmar ram inthlanna boruak vel avang leh Myanmar sipai sorkarin tihluihna a inthlan a buatsaih tuma Myanmar sipaite'n Chin state-a Falam township a beihpui an thlak avangin Champhai district-a Vaphai khua-ah hian raltlan 89 an rawn lut a. Falam township chhunga K Haimual khua a cheng mi 47-te hi November ni 28 khan Saikhumphai-ah an rawn lut tan a. A tuk lawkah Vaphai lamah hruai chho in Community Hall a dah an ni a. Hemi hnu December thla khan Falam township chhung tho ami Hrumhrang khua atangin raltlan 42 an lo lut leh a. Community Hall-a an len tawh loh avangin Fiaratui Middle School-a dah an ni a. Kar leh Nilaini khian sikul an kai leh tan tawh dawn avangin an chenna tur hi hmanhmawh taka sak chhoh a ni ta a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

LADC

Nikum December ni 3 a Lai Autonomous District Council (LADC) inthlan hnu a sorkarna siam tura inbuatsaihna-ah kar leh Nilaini khian chairman thlan a ni dawn.

Puan tawh thin angin bial 25 awmna LADC ah MNF chuan bial 8 la-in, Congress in bial 7, ZPM in bial 6, BJP leh Independent in bial hnih ve ve an la a. Party mala Sorkarna siam thei an awm loh vangin ZPM leh MNF chuan ZPM kaihhruaina hnuaiah Sorkar intawm an siam theih thu Krismas hma khan District Council & Minority Affairs department kaltlangin larsap hnenah an thlen tawh a, larsap pawmpuina nghah mek a ni. Larsapin protem chairman atan a ruat Pu Lallura Chinzah chu December 22 khan Lawngtlai Bawrhsap Pu Donny Lalruatsanga'n rinawmna thu tiamtirin a laluta, protem chairman hian MDC tharte a lalut zui nghal.

Larsapin ruahmanna a siam angin kar leh Nilaini, January ni 7, khian LADC Chairman thlan a ni dawn a. Chuh tumte hming pekluh theih hun chu Thawhlejni (January ni 6) chawhnu dar 3 thleng hawn a ni. Sorkarna siam tuma thawk dun mek, ZPM leh MNF te'n ruahmanna an siamdan chuan Chairman atan MNF Member ni tura tih a ni.

<><><>

METH SEIZURE

Nimin khan Assam Rifles leh Mizoram Police tangrual chuan Keifang khaw huam chhungah methamphetamine kg 11 leh gram 62 an man.

Myanmar atanga Methamphetamine tawlhurutu ni a rinhlelh, Hasan Ali, Badarpur, Assam a cheng ni a inchhal chu a ruihhlo phurhna lirthei nen Saitual Police Station-ah hlan a ni a. Ruihhlo tawlh a nih dan hi chhui zui mek niin Saitual Police Station-ah hian Narcotic Drugs & Psychotropic Substances Act, 1985 hmangin thubuai ziahluh a ni a. Hasan Ali hi Saitual district court a hruai a ni a, Police lam dil angin Court chuan Saitual Police Station-ah thu zawhfiah tura kawl zui a phalsak a ni.

<><><>

FIRE

Fire & Emergency Services-in a tarlan danin nikum khan December ni 17 thlengin in kang avanga sum hloh zat chu cheng vaibelchhe 4, nuai 45, sing 6, sang 4 leh 830 hu niin, kangmei chhuaka bungrua chhanhim zat chu cheng vaibelchhe 29, nuai 72, sing 6, sang 2 leh 670 hu a ni.

Hriat theih chinah in kang 27 a awm a, nunna chan 1 awmin hliam tuar 1 a awm bawk a. Ram hmun 179-ah a kang bawk a ni. Kum 2022 khan in kang 34 awmin, ram hmun 140-ah a kang a, kangmei vanga kum 5 chhunga thihna thlen tam ber kum niin mi 15 in nunna an chan a, mi 11 an hliam bawk a ni. Fire & Emergency services hian tun dinhmunah kangthelh motor 48 a nei mek a, a thar dang lei turin an inbuatsaih mek thu dawn a ni.

<><><>

CHHATISGARH ENCOUNTER

Chhatisgarh Bastar Division-a vawiina hmun hniha Maoist leh security force-te inbeihna thlengah Maoist 14 an thi. Inbeihna hi Bijapur leh Sukma dist-a thleng a ni a, Sukma dist-a Konta biala inbeihnaah hian Maoist 12 kah hlum an ni a, Bijapur dist-a Basaguda-a inbeihnaah 2 kah hlum leh an ni bawk.

Maoist thi-te ruang hi security force-ten an hmu kim tawh a, inbeihna hmunah hian silai leh ralthuam dang engemawzat hmuh a ni bawk.

<><><>

VENEZUELAN PRESIDENT CAPTURED

Venezuela President, Nicolas Maduro-a leh a nupuite chu man an ni tawh tih US President Donald Trump-a’n sawiin an ram atangin thlawh chhuahpui an ni tawh, a ti.

He thu hi social media-ah tarlangin Pu Trump-a chuan Venezuela leh an hruaitu lu ber laka sipai chakna hmanga beihpui thlak chu a hlawhtling hle, a ti a, beihpui hi US Law Enforcement nen thlak anih thu a tarlang bawk.

Tukin khan Venezuela ram khawpui, Caracas-ah nasa takin bomb a puak a, Venezuela chuan Donald Trump-a kaihhruai US sorkar chet dan chu na takin a sawi sel a ni.

<><><>